

# MOTKOM PO LEĐIMA MINISTRA ZBOG USKRAÆENE OKOLINSKE DOZVOLE

30 August 2007

Dana 29.8.2007. bh. mediji su objavili vijest da je Drago Lukenda iz Širokog Brijega, inače dobitnik koncesije za izgradnju mini hidroelektrane na rijeci Dušici u selu Duge kod Prozora, drvenom palicom ispred zgrade vlade HNK napao Zejnila Trešnjicu, pomoćnika kantonalnog ministra za zaštitu okoliša.

Kako tvrdi Zejnil Trešnjica, napad je najvjerojatnije uslijedio kao reakcija vlasnika firme Eco Energy(!!!) na odbijanje ministarstva da izda okolinsku dozvolu za projekat MHE u Dugama. Trešnjica smatra da je razlog za napad činjenica da je dan prije napada upravo on potpisao rješenje kojim je Lukendinoj firmi odbijen zahtjev za izdavanje okolinske dozvole za izgradnju male hidroelektrane.

Udruženje za zaštitu okoline "Zeleni Neretva" iz Konjica oštro osuđuje ovaj incident te smatra da počinilca treba pod hitno sankcionirati.

Inače, predmetna elektrana je već godinama sporna. Zanimljivo je da su mještani Duga mahom protiv jer bi realizacijom projekta ostali bez vode, a nestao bi i poznati atraktivni vodopad neposredno ispod sela, a koji je pod zaštitom države još od 1958. godine. Nasuprot stavu mještana Općina Prozor je dala koncesiju pomenutoj firmi. Nema sumnje da naziv firme koncesionara (Eco energy) garantuje visoko kvalitetnu ekološku energiju čija se realizacija želi ostvariti i motkom po leđima ministra.